

Ko te wharekarakia ma te Pihopa o Waiapu e whakatapu, nana hoki i whakatakoto te kohatu o te Kokonga. Ina tu te Pihopa mo te iwi Maori i roto i enei ra, ka karangatia ia hei manuhiri ki te hui, māna e āwhina te Pihopa o Waiapu. Ka whakatutukitia tena taha i te 11 o nga haora o te ata o te Turei te 16 o Pepuere.

Ko te Kohatu ma te Kāwana-Tianara, ma Sir Charles Ferguson e hura i te 3 o nga haora o te ahiahi o taua ra ano. Kua whakaaetia hoki e te Kawana te pōwhiri ki a raua ko tana wahine kia tae mai ki tenei hui, a kei te nui to raua tumanako kia kite whaiti i te iwi Maori ki tetahi o o tatau marae.

Ki te taha o enei take i runga ake nei kei te tumanako nga tangata whai mahara kia whakahuihuitia ki te wahi kotahi mo tetahi wa poto nga tangata hei kimi, hei whakatakoto i nga kupu mo te ahua o te iwi Maori a nga ra e heke iho nei. No te Tai-rāwhiti te marae o tenei karanga a tatau, na reira ka mea atu ki te Tai-Hauauru. "E hoa ma! haere mai tātatau ki konei tiro-tiro tahi ai i to tātatau ahua, me kore e kitea he kupu hou. Te wahi whakaaro i tenei, i tera, me tūhonohono, kia tinana ai he kupu pai, hei arahi i te iwi i roto i etahi o nga mahi. Na reira e tā Pomare! Haere mai me ena o a tatau tamariki. E tā Te Rangihiroa! Mauria mai nga titiro hōhōnu a tou ngakau mahara. Kua roa tenei te wa e ngaki takitahi noa atu ana tatau, a he hanga mokemoke."

E hoa ma i te Tai-Tokerau haere mai! Ko te purapura i tiria ki Paikia kua whai tinana ki nga wāhi katoa o nga motu nei. Ko nga kupu i whakatakotoria ki Waitangi kua waiho hei taonga ma te iwi Maori katoa. Ko te whakapono, ko te ture, nau enei taonga i ātua manaaki. I te ra i whakamatautauria ai te ao ki roto i te pakanga, ka tū tahi ena tamariki me enei tamariki. I kona te Tai-rawhiti i nanahi tata nei i te ra o te Whare, o te Kohatu whakamaharatanga ki te Tiriti o Waitangi. E tā Tau Henare, haere mai! Kia kite ā kanohi atu hoki enei o nga morehu i a koe, i nga tamariki whakahaere o te tai whakararo.

Te Waipounamu i tua o Raukawa kua roa rawa tenei te wa e kore ana e kitekite. Kei a koutou na e waihanga ana etahi mea hou ma tatau, ko koutou hoki kei roto i te matotoru tanga o te iwi pakeha. Haere mai! Me kore he kupu i a koutou hei tohutohu mo te ahua o te iwi Maori ina hohōnu atu ki roto i te pakehatanga. E tā e Uru! Ko Porourangi tenei e karanga ana ki a Tahu-potiki.

Te Tai-rawhiti! No tatau te marae e karangatia nei kia hui mai nga motu e rua ki reira. Te Arawa. Nāu i tuatahi te kōkomo ki roto i te whare o te Atua nga taonga a o tatau tipuna. Ko ou ringa tohunga kei te āwhina i nga mahi o te whare, a mau ano e haramai e manaaki tau taonga. Haeremai hoki ki te whakanui i enei o a tātatau tamariki, nana i hapai te ingoa o te iwi Maori i roto i te pakanga.